



藝文

士先器識而後文藝以本末言之也夫文以載道又以行遠文豈盡可畧哉故書以道政詩以達情典謨風雅自古爲昭矣雲霄自玉鈐有集歷宋明以及昭代作者如林雖其間或傳或不傳要其立言垂世和聲鳴盛歷久常新者不少也書不能備載錄其目以待好古者之考求而詩文則別其有關利病興廢人情風土者存之誠因文以考政因詩以察情歷代之創造革除見焉一方之志言景象彰焉於吏治未必無少補云爾志藝文

唐

陳元光著玉鈴集

陳 珣著雲溪遺稿

宋

蔡元鼎著語孟講義 大學解 中庸解 九經解

洪範會元 辨類詩 蒙齋詩文集

陳景肅著石屏擷翠集 禮疏 詩疏

鄭 柔著康正題詠

薛 京著九侯詩集

明

陳汝輝著南臯文集

吳 原著南行藁 浙巡錄 奏議 雲坡集

江 環著詩經衍義

雲霄廳志 卷十七 藝文

二

林偕春著雲山文集

吳 顯著郵亭草

唐文燦著享帚集三十卷 四六集

吳夢麒著宏治集七卷 端一齋總錄 五行前用稿

國朝

唐朝彝著易學說編 西臺疏草 滙青堂詩集

陳夢琳著臺灣志 漳浦續志 他齋詩文集

吳 璐著雲峰詩集

何子祥著蓉林筆抄

吳荆山著體齋詩文集四卷

唐文

詔陳政鎮故綏安縣地

唐高宗皇帝

泉潮據閩廣之交嶺南為獠蠻之藪玉鈐衛翊府左郎將歸德將軍陳政剛果有為謀猶克慎其進爾朝議大夫總嶺南行軍總管事掛新鑄印符率府兵三千六百名將士自副將許天正以下一百二十三員從其號令前往七閩百粵交界綏安縣地方相視山源開屯建堡靖寇患于炎荒奠皇恩于絕域筮辰僉吉明發斯征莫辭病病則朕醫莫辭死死則朕埋斯誓斯言爰及苗裔爾往欽哉

本郡邑志

雲霄廳志

卷十七

藝文

三

請建州縣表

唐陳元光開漳將軍

泉潮守戍左玉鈐衛翊府左郎將臣陳元光言伏承永淳二年八月一日制臣進階正議大夫嶺南行軍總管者受命戰兢抵官彌懼臣以冲幼出自書生迨及童年濫膺首選未習干戈守至懦至柔之質惟知飽煖無曰區曰處之能幸賴先臣緒業叨蒙今日國恩寄深都閩任事專征爰從視職以來不敢少有寧處况茲鎮地極七閩境連百粵左衽居椎髻之半可耕乃火田之餘原始要終流移本出于二州窮凶極暴積弊遂踰于十稔元惡既誅餘兇復起法隨出而奸隨生功愈勞而効愈寡撫綏未易子育誠難竊惟兵革徒威于外禮讓乃格其心揆茲陋俗良由職方久廢學校不興所事者蒐狩爲生所習者橫暴爲上誅之則不可勝誅徙之則難以屢徙倘欲生全幾置刑措其本則在創州縣其要則在興庠序蓋倫理講則風俗自爾漸孚治法彰則民心自知感激切以臣鎮地曰安仁誠爲治教之邦江臨漳水實乃建名之本如蒙乞

勅定名號而復入職方建治所而注頒官吏治循往古之良規誠爲救時之急務胡越百家愈無罅隙畿荒一德更有何殊臣謬居外鎮忝在封疆所得事宜合奏謹具厥由伏候勅旨

本郡邑志

謝准請表

陳元光

左玉鈐衛翊府左郎將進階正議大夫嶺南行軍總管臣陳元光言伏奉垂拱四年六月二十九日制除臣中郎將右鷹揚衛率府懷化大將軍輕車大都尉兼朝散大夫持節漳州諸軍事守漳州刺史贊治尹營田長春官使者伏以社稷初開首有官僚之建皇天眷命重茲樛櫟之才山川頓改人物更生竊念臣州背山面海舊爲蛇豕之區椎髻卉裳盡是妖氛之黨治理誠難撫綏未易恭惟陛下威震百靈氣消六沴自東自西不違于指顧我疆我理咸得其區分民心有繫土俗轉淳覺昨非而今是必舊去而新更竊惟治巨室者不用乎條枚蓋明堂者不參于瓦礫茲遇陛下日月其明乾坤其量知臣樸忠有守寒松不改乎凋年膺力猶剛老馬或諳于故道申命曲加因郵傳賜寵之以二政之隆畀之以十州之重雖則殊鄉還同晝錦光華奚止于一身爵祿許推于後裔人皆謂榮臣獨知懼粉身未足報深恩萬死實難酬厚德已從此

日望闕謝恩繼當恪守詔條徵庸俊乂平均徭賦示以義方持清淨以臨民重脩前志守無私以奉國再礪于衷展駑駘之力申鷹犬之勞庶荒陬蠻獠盡沐皇風率土生靈備聞斯慶臣無任感恩隕越之至

本郡邑志

宋文

圖經序

宋通判吳與漳浦人

謹按本州在禹貢為揚州之南境周為七閩之地秦漢為東南二粵之地漢武平粵為東會稽冶縣并南海揭陽之地晉宋以來為晉安義安二郡之地皇唐垂拱二年十二月九日左玉鈴衛翊府左郎將陳元光平潮州寇奉置州縣勅割福州西南地置漳州初在漳浦水北因水為名尋以地多瘴癘吏民苦之耆壽余恭訥等乞遷他所開元四年勅移就李澳川置郡故廢綏安縣地也自初置州隸福州都督府開元二十二年四月二十二日勅割隸廣州二十八年勅復隸福州州本二縣一曰漳浦即州治也二曰懷恩二十九年十一月二十二日勅以戶口逃亡廢之併入漳浦又割泉州龍溪縣隸本州大歷十一年福建觀察使皇甫政奏割汀州龍巖縣來屬十二年五月二十七日勅從之天寶元年改為漳浦郡乾元元年復為漳州興元二年刺史柳少安請徙治龍

雲霄廳志

卷十七

藝文

六

溪福建觀察使盧慧錄奏貞元元年十一月十六日勅從之遂以龍溪城為州定管龍溪漳浦龍巖三縣山川清秀原野坦平良山記董奉之遊九侯傳夏后之祀趙佗故壘越王古城營頭之雉堞依然嶺下之遺基可識陳將軍忠貞冠代王使君勳烈標時周先輩之奇才潘待郎之重德大同有九虬之瑞開元出祥雲之符靈跡應祈筋山屏盜遺芳未泯勝概可尋蔚為江外之名邦不特閩中之要地凡諸可紀悉具于後

本郡邑志

漳州守臣題名記

宋本朱熹新安人

漳以下州領軍事唐垂拱二年用左玉鈐衛翊府左郎將陳元光奏置領漳浦懷恩二縣而治漳浦開元四年徙治李澳川在舊治南南字疑北八字之訛八里二十九年廢懷恩入漳浦而割泉州龍溪縣來屬天寶元年改漳浦郡乾元二年復為州大歷十二年又割汀州龍巖來屬貞元元年乃更徙治龍溪唐末五季之亂嘗為泉州支郡而偽刺史董思安者至以私諱輒改號南州我宋乾德四年泉州陳洪進以二州版圖歸王府始詔復故號太平興國三年五月一日洪進入朝請遂以衛尉寺丞劉援來知州事而五年又割泉之長泰縣以屬焉蓋凡漳之所以為州其本末之可攷者如此其守將則陳公歿而為神今以王封廟食後乃或見或否以至於劉侯而後始有紀焉蓋其壁之記本嘉祐中鄭侯公偕之所立逮淳熙中火而復刻則又趙侯公綢之為也紹熙元年假守朱熹至而觀焉則其木理往在龜裂且其所書又太煩悉而將無地之可書

雲霄廳志

卷十七

藝文

七

也乃為買石延平龔置廳事更為擘窠省文之法以寫舊記而虛其左方以俟來者云本郡邑志

石屏陳公廟碑記

宋本郡守方來

維嘉定十有五年朝廷舉象賢之典錄勤勞之臣廉獻陳公首有墳廟方來實董其事嗚呼古禮不復非惟民非三代而吏鮮以三代化民者若陳公景肅其三代之遺愛曠世之逸民者乎居家孝友三代之彝倫也修已學行三代之道藝也貢舉而拔文武三代之賢能可興也一邑宰而伐惡彰善樹之風聲由守郡而靖盜安民勒之金石制誥而贊王命宣慰而振國威於戲斯道義高而藏再辭而起易箚而終太常誄其行貫郡守樹其封碑天子賜謚斯民成廟生榮死哀三代備禮末世罕聞筆宰兩孤器宇宏卓吳鄭薛楊諸君較刊始末咸謂先生勤事至死德施于民宜備祀典因卽講所漸山之麓下建爲祠上封爲墓畢功而書於石以象先生之德以作後學之式碑曰於赫大夫何天之衢以禮爲御以樂爲輿受命作牧威慈四擴制誥屠龍刃無虛族奕世承芳門第顛印入巖拈景金碧輝煌斯州官守篤公士友播詩樹碑垂德永久

三代表兮道誰裁兮瞻斯塋兮寓死哀兮

本郡邑志

明文

奏薄征下壤疏

明大理寺卿 陳汝輝 本局人

洪武二十五年四月十日吏科給事中臣陳汝輝謹奏為薄征下壤以息邊民事臣伏讀周禮嘗歎其治出于極文之後而直接於唐虞夏殷之先雖秦漢刪文返朴之令皆無及者豈不以治當酌時勢之宜不責於文質之守國家建治實準周官三公六卿之守無不阜成而司徒保息之方則未體悉邇者命官沿邊建堡周於防禦殊不知民居離散無可防禦者則今雖防民之奸而實未嘗養之於善也創業垂統之始可如是乎臣伏觀沿海士民荒饑之後困苦之狀皆由課征所致蓋其田廬沒於流沙而租課迫其輸納陛下雖廣求民瘼參酌其便宜者以定其制而所厚者治於京畿平野之間而弗均於嶺海遐邊之地愚臣以為當體周官保息之政以寬沿海沙壤之征田沒水者蠲其征園多沙者汰其米彼其民艱於耕作樂於寧息且逢豐稔之年雜以魚鹽之利

雲霄廳志

卷十七

藝文

九

漸致富庶易於成治不然魚鹽已輸矣而田園沙水靡常者又征之臣恐開國之初已不堪命民不寧居矣垂及百年官吏日以貪酷風俗日以華侈風沙日以湮沒哀哀邊民呼無死所矣此豈聖聰所忍聞哉伏乞睿旨勅下沿邊諸郡勘明而削除之乃造冊以定其制庶幾遠近一體同享太平之休以接成周之治臣汝輝不勝感荷惶悚之至謹具疏以聞

本郡邑志

乞蠲久沒牛米奏疏

明許海福詔安人

福建等處承宣布政使司漳州府漳浦縣三都二圖臣許海福謹奏為
乞恩蠲除久沒牛隻稅米以蘇民困事本縣三都四都六都九都先該
丙午歲元守漳州右丞羅良因備禦潮寇鍾猛虎等大興三都溪東土
橋屯田取牛六百隻耕種贍軍及羅良為元平章陳友定所併時牛隻
俱存每年稅米二石民納無怨至我朝洪武元年二月御史大夫湯和
遣裨將參雄引兵徇漳州守將萬戶陳納以軍民版藉納降至二年冬
十一月本府按藉追徵米麥併及前項牛隻稅米一千二百石時牛隻
死亡略盡本府行縣拘集都分領牛軍民賠販前米民已不堪至二十
二年牛隻死盡無存適遇糧長邱德何東高承縣牌拘拿牛隻人戶陳
仲海翁玉吳宏等約四百人米不可解易之以布布不可用復易之以
銀民間納米頗易辦銀甚艱比至交納該催糧長斗給人役却乃嫌銀
低醜抑令傾煎每銀一兩蝕幾二錢納完守取收批又不勝留難刀蹬

雲霄廳志

卷十七

藝文

十

冤聲塞道苦怨徹天臣目擊情狀深為扼腕竊謂牛隻若存民食其力
米輸于官是為上下交益軍民兩利今牛隻死沒垂五十二年而小民
虛販稅米不廢司府視為國課小民情莫上達民惟邦本本固邦寧根
本有傷禍必貽國恭惟皇帝陛下靖艱踐祚革除弊政如恐不及量臣
遠方小縣弊民之政莫甚於虛販牛隻稅米一經聖心必加憐恤臣來
京時被害小民祝臣以所奏必允臣辭父兄誓以所奏若不允不歸古
今天下豈有五十一年堪耕牯牛不死牛死已久聖君賢相焉忍視民
困而不蠲除者緣係乞恩蠲除久沒牛隻稅米以蘇民困事為此具本
赴通政使司具奏伏候勅旨

永樂二十一年十月十三日奉聖旨我皇考初定閩中隨調長興江陰等衛官軍
分鎮戍守復差侍郎夏原吉巡撫蕭瑄弊政今覽海福所奏朕為惻悼該屬有司
視海福真為有婉矣着戶部速行福建布政使司將久沒牛隻稅米盡行蠲免永
不復徵別行吏兵二部推選忠勳大臣領勅前往福建巡撫盡革吏弊民害欽此 邑志

新建雲霄石城碑記

明布周 宣
政使人 莆田

雲霄在漳州郡最南境北去郡南由南詔入潮各二百里林箐深蔚瘴海外浮故多盜其地在唐爲郡城民淳物阜盜至先及焉正德嘉靖歲繼患侵掠時布政使陳公錫副使范公永鑾用義民吳子濡等建議築城以扼要害知縣周君仲縣丞余君經續上其事巡撫潘公希曾汪公鉉巡按劉公廷篔聶公豹咨布政使錢公宏按察使周公用守巡謝公顯儲公洵咸允遠圖兵備簽事謝公汝儀知府陸公金乃躬蒞相高下廣狹之宜而規畫之其程督則同知張公遠周君仲以授訓導彭潛典史錢文華而屬子濡專理之也城砌以石高丈有八尺馬道實以土廣如其崇之半圍以丈八百二十有五西北附山東北阻谿以爲隍空衢之衡爲門門與樓四窩舍十有三凡糜金錢四千六百緡有奇出諸推官黃君直市淫祠之積子濡與其兄子元等以下若干人量貧富捐資以足之輸力六百日己丑夏始以及庚寅冬也役將竣功適僉事梁公

世驟至董厥成焉雉堞屹起崑然壯觀則控粵屏閩之地有金城湯池之固而狐寇潛行草澤中者睨視雲霄真如天險之不可升矣仲等喜民有完堵乃具書令子濡謁記于予予惟易重設險而尤以傷財害民爲戒是舉也勞而能佚得使民之道焉費不及奢得用財之道焉因山谿以爲城得設險之道焉是皆可書已有城以爲固又得人和以守之是方之人吾見其去草動之虞而就絃誦之樂因守望之親而興禮讓之風矣雖然禦寇之有城猶捕獸之有機穿也無獸而爲機穿則機穿爲長物獸至而圖之無及矣繼今蒞茲土者無以是城爲長物哉初議之興也予道是入廣嘗力贊其決適成也余又再至故爲之記特詳焉

雲霄復公溪泥泊記

明工部尚書朱天球

先王之世鄉田同井溝洫畎澮之公駿發徹併之法民遵上之度罔敢渝或故當其時貨惡其棄于地不必藏于己力惡其不出于身不必爲己雍睦輯寧之風藹然可挹其上之人又不禁澤梁與民共之民是以公溥其利沾足熙皞無獨饑獨寒者猗歟盛哉自先王法廢民始有兼併攘竊之謀誠有歎貧富不均如連阡陌無卓錫云者盜竊亂賊由是以作曷勝患己我國家深仁渥澤藏富於民凡山澤之利悉捐與民不爲禁顧饗誠之民有肆爲兼併攘竊封利以自肥者余居常聞其人輒憤恚不直之入官蒞政遇以是事至必麗諸法公其利而後己蓋居今之世旣不能復古先王之法而爲國家守良法沛宏澤俾古昔大同之俗雍睦輯寧之化庶幾復見者則願身親見之也乃今幸於吾鄉見之雲霄有大溪達海者二一自南山尾歷蠓潭竹塔油草等界迄於烏坵一自南山尾歷高溪大墩橫山等界迄于北崎海潮日再至兩岸淤爲

泥泊鱗介諸利產焉二溪會于海口中流突起大洲廣袤十餘里名爲中洲大塗其產利視南北諸泥泊尤盛官不爲禁環海千餘家胥藉以生若恒產然成化間有豪民某者設網門築田其間再傳而其孫席富強餘習攘爲己業漁者必入稅而後敢碾足一方公利專爲一人之私物民莫敢誰何者殆百年所萬歷二年鄉民陳川等數百人奔籲於巡海副使會稽陶公某下其事於郡二守沈公某沈公廉其狀乃還公利於一方而以報陶公轉報撫臺臨武劉公某按臺餘姚孫公某咸是之且令立石垂之遠於是耆老輩造余求紀其事嗟乎此先王之遺政也夫自大同之世遠民有併力均收而寓雍睦輯寧之化者公利是也沈公加意窮民舉遺政於千百世之下復公利於百十年之餘監司諸公又且同心共濟使雲霄環海之民自今始生養有資嬉嬉然出入友厚和氣薰蒸無獨饑獨寒之歎庶幾見古大同之俗者誰之賜也夫茲政也古之遺愛也爰宜勒諸石以紀其盛

謹按大司空朱公所紀乃前明萬歷間事也至

國朝康熙五十五年木轄泥泊自高塘起至覆鼎地方止共計水程五十里復爲豪強勢惡霸踞經鄉民陳城陳宛及胡五等具控 列憲蒙 制憲覺羅滿 據司早詳批示通行永禁不許霸佔有違犯嚴加究處飭浦邑令勒石通衢曉諭在案嗟嗟一泥泊也強惡橫踞於百餘年之前復橫踞於百餘年之後屢加禁治始終一轍隅強肆其吞噬積習難移一至於此今苟得相安無事司牧者亦可姑聽之自然免致滋擾不然前案具在法律森嚴持三尺以從事則亦有無可如何者耳石碑禁示恐歷久被滅附載以垂永遠

遵奉

院憲嚴行勒石申禁不許霸佔

碑記

漳州府漳浦縣爲呼天申禁等事康熙五十五年十一月初四日蒙

本府信票本年十月三十日蒙

布政使司憲牌本年十月二十七日奉

總督閩浙部堂覺羅滿 批本司呈詳查得沿海塗濠聽民採捕原出於天地自然之利爲海畔窮黎資生餬口而豪強勢惡欲壟斷而霸踞之并其所有不容採取此陳城陳宛以及胡五等遂有呼天申禁等事之控奉院憲批據漳浦縣查詳行司轉飭查明起止地名里數通詳勒石永禁等因遵卽轉行漳州府漳浦縣查明自雲霄高塘起至覆鼎地方止共計水程五十里俱係通行官泊應於起止地方永禁不許霸佔倘有違犯嚴加究處等緣由詳覆前來相應轉詳 憲臺察照嚴批以便轉飭勒石通衢永禁毋許豪惡仍行霸佔倘有違法卽查明指名通行嚴拏究治庶豪棍知儆而窮民得安生業矣合就詳覆伏候

憲臺鈞察批示以便轉飭遵照取具碑摹呈送等緣由奉批仰飭勒

石永禁取碑摹送查仍候

撫部院批示繳奉此又爲前事本年十月二十六日奉

巡撫都察院加一級陳批本司詳同前由奉批仰候

督部院批示繳奉此合就飭行備牌仰府照依

院批詳內事理即便轉飭遵照勒石通衢永禁不許豪惡仍行佔踞

倘再違犯即嚴拿指名通詳等因到府轉行到縣蒙此合行勒石豎

立通衢永禁不許霸佔毋得故違取咎須至碑者

康熙五十五年十二月

日立

碑在廣慶保瓦窰前溪邊

郡倅呂侯復公溪修城記

明提學副使 劉庭蕙 漳浦人

按雲霄之有鎮自正嘉年昉也鎮故名懷恩古縣地迄南距椽林延袤數百里深林叢莽羣不逞多嘯聚其間迤東嶼埔山竇菁畚猺獞時出爲寇鄉導而直北第一關以外蜿蜒盤鬱人烟寥絕行李畏途蓋居人日懾爲三險云夫三險者政屬浦詔平之衝而去邑遠三部之民多雜處茲鎮凌巒詬誶不能裹糧白公庭于是強者無憚文罔而弱者輒俯首受吞茹以爲常昔嘉靖辛酉饒寇內訌弊皆由此以故鎮且置尉其地加嚴焉就近彈壓勾攝讞決得以一切行事權綦重矣顧前此來鎮者非厭棄涼澹則復遽廬視之經年無所建白爲民庶興一利釐一蠹徒有其名而止爾予去歲道出雲霄見三邑部民青衿而楚楚者緇撮而樸茂者糾笠而襍羅者羣聚于當道管大夫之門上頌牘願尸祝呂使君也者以水棠思管大夫嫗媮受之且曰予業有聞矣爾儕月旦洵不爽是可爲將來賢使君勸也蓋予不佞退而遍詢其治狀縷縷不可

指詘而繕郡郭一節則百餘年以來所未及剏始福利也嗟嗟使君得其大矣鎮故有公溪爲豪家專據者若而年萬曆三年有陳姓者出而與爭蓋亦野兔競逐之意讞書上斷從公採取反其私據於今案墨尙鮮立石館鎮如新也而郵胥土著表裏爲奸敢於執法條禁倏奪不啻蔑視爲故紙侯至會鎮民以散佃繕城請慨然主其議爲申達於部使監司其略曰溪隸雲鎮爲民間利長遠矣地有悍豪方某實奄有之今已下令悉追出以佐脩城之需歲餉不闕其供俟城竣之日更議焉諸大夫僉署其牘曰可其歲所侵粒往者置勿論嗣犯以麗於三尺不宥也至是郵之奸胥鄉之豪民公亦毅然有以討其橫而軌諸法且也繕郭緝雉業有藉資將纍土殖殖起矣向微公柄議其上誰能爲我父老子弟立不拔善建哉侯家世多名卿鉅公而處之澹如布衣疏食不炫鄉間用能綜繹諸政務猶其家節約也而民庶戶誦而尸祝之也有如嬰兒之戀乳哺不能一日輟而忘也非閱於家學而湛于道德仁義能

致然乎侯名繼梗字思楸起家乙酉鄉進士爲泲之新昌人

本浦
邑志

雲霄廳志

卷十七

藝文

十六

議雲霄鎮事紀

明知劉庭芥

漳浦人

雲霄故漳浦一巨鎮也下接詔安旁通平和舟車之衝人物輻輳又其地多險阻林叢若椽仔林諸峒地深味而多浮民姦軌萌生出沒至不可究詰當事者憂其然請于朝爲寘督捕館而以府通判一員任之凡三縣道之民館得以一意督察盜賊發館得以一切躡尋案驗民以事詣館告者館得受其詞爲捕治以罪輕重行罰自置館以來于今且十年民視館若大府然夫府故有海防館職司群盜歲時巡行下邑權重于賊曹而茲督捕之設於事權不能無分分則不能無生得失又其地在浦封內諸猾借公執仇往往構爲盜端以聳上聽一行告訐株連殆遍豪恣而不可戢縣官知而不敢問是館與令中分縣又環漳諸路所以宿重兵者備他盜耳今以總兵居南澳而參將守郡城聲援策應邈不相及館責在督捕曾不足以有所禁禦奈官與地左何龍館行部不旬日而之郡還返之期二縣未及聞而輿馬之勞迎送之煩漳浦獨當

之錢用諸費不訾是館爲三縣設而漳浦之民未受館之利也此數者其於利害較然建議者熟視而不定豈可謂工哉王侯明正其議請屯札捕館于郡遙管捕事以重上官之體而俾參將居其地不則以把總充之蓋以一事權而杜爭訟壯長城之勢而省供億之苦諸縉紳先生曰善哉侯之有茲議也夫圖事揆策不惟根本之慮而徒徇目睫之計者未可以經遠也夫還督捕而以參將代之此計出萬全豈凡所見乎其議誠行將雲霄南澳兩軍表裏諸縣道之有異心者破膽而不敢謀其於建威銷萌無煩專鎮爲矣若夫訟獄衰息供億鮮少抑其次也善乎侯之爲議也雖然茲道也詎宰一邑也與哉

本浦邑志

免雲霄鎮稅紀

明副林 紹漳浦人

漳浦無礦亦無稅邇者礦使浮募金浦之名剝開榷塲於雲霄鎮市市民以該鎮距詔安百里詔安已稅雲霄復稅民日擔負魚蝦薪米之末僅售刀錐安論餉課于是驚擾久之白晝揚旂一夜深舉火舍人倉遽歸報中貴人怒髮上指幾為侯累侯慨然曰臣以無罪待罪銅章倘得為民弭患從貴人逮係歸鄉里民職塞矣於是市民感奮爭以其行貨居貨自占歲率攤錢百緡輸之官徑解內監無令別遣材官重擾民為議上撫臣臺臬嘖嘖異之侯又上言曰夫浦邑之有雲霄猶全閩之有漳浦也先年倭饒煽亂鎮人負其魁桀之氣開關延敵賊人大創至不敢城下彎弓微獨浦邑賴之即全閩亦賴之矣今若起稅勢必凋疲蕩析在目前無過九牛一毛之利一旦東南有警是我且自撤重門彼必別生內變甚非鎮守自為桑土之計也中貴讀侯危言且咤且慌坐稅百緡旋亦報罷噫侯之遇事慷慨籌慮深長類如此君子謂侯之惠

全浦雲霄鎮其一也其惠雲霄鎮議免稅其一也鎮人立石以頌侯瀾瀾之德有以也夫

免雲霄鎮稅紀

明御吳 案本屬人

夫征商非古也自大工大兵之役興而始倣率貸法中貴人分道董稅若魚鱗然網蓋彌天矣然稅有定地稅之者有顛役浦巖邑也雲霄又浦之東偏也其民負海為生蛟龍之與爭而中貴人過聽無情者漫謂是彈丸可稅哉馳一介使者駐焉為竭澤計始至洵洵公逆其必弄潢池也預遣所部兵從使者陽唯諾而潛掣肘之乃使者竟耽耽橫決不可當翩彼鳴鴉飛而攫肉舟車襁負魚鹽菽粟無不算入錙銖者其細已甚民弗堪也蓋間架過唐青苗過宋使林總囂然喪樂生之心而難走死地如鶩稍稍攘臂揭竿嘯矣公推赤招攜諭以大義力免使者無他虞更覈諸賈禍奸細法之以謝百姓民始帖然而使者遂縮首向無諸去公於是復退而却顧曰止沸者撤其薪清流者澄其源今民即微命且夕乎倘稅額未蠲更重辱使者以示必行禍之蔓也何日之與有則又飛檄當道毅然請革條析利病苦口危言直欲以去就爭之而

雲霄廳志

卷十七

藝文

十九

無聽其極重而不可返中貴人竟悔且怵諸凡無名橫稅一朝報罷驩聲雷動矣夫秦越黔首者頤權貴旨以相魚肉咄咄無足道乃棘在攻瑕怒號使氣眾犬方狺兩虎必傷卒以元元為池魚亦非善後之福也公其直如矢遜以出之善刀而藏不快一割默批卻窾障狂瀾而蘇涸轍幹濟妙用豈人力也乎哉哀我人斯東南之琛寶已盡矣幸得保升斗備饘粥以無填於溝洫孰錫九鼎今而後我敝邑用克保聚衣租食稅仍享坻京羊不羴首燕不巢林是零陵之亂復未足奇而合浦之珠還難專美也敢載筆而傳膚功於不朽

康熙丁丑春有巨帥遣其爪牙士開魚行於雲霄蓋私稅也發示到縣知縣事陳侯汝成力持之呼爪牙士以語還其示且上

邑志

雲巨帥開陳切直帥尋悟得不行此事與王公後先媲美而雲霄人不知也嗟乎一雲霄鎮也中貴人欲稅之於前巨帥欲稅之於後實皆本地奸民為之勾引耳向微二公保無挺而走險哉後之為政者尚其稔諸 蔡衍鏡記

新建雲霄土城碑文

明知吳仕典鎮海衛人

皇明列聖相承深仁厚澤淪浹幾二百年是以薄海內外其民至于老死不識兵革漳郡故號禮義文獻之地而其界西北皆高山絕壑與江廣接壤近數十年來無賴負幽嘯聚村落荒草斷烟天陰鬼啾爲政者患之故民居鱗集之去郡邑遠者輒各狀聞於官自設城塹爲捍禦計程不官督費不公需浦邑之西有土曰雲霄背山面海烽烟千家幾罹寇難時漳南道陳公大舉府主羅公列首唱保障之義以功力浩大不果荏苒至正德辛未寇愈熾而勢愈不可支義官吳子霖廼謂雲霄之人大者皆吾族屬姻婭小者皆吾臧獲阯隸而其廬寢墳塋決不可坐視而殘於寇也爰議創城自於官可其狀謀於族贊其決告於衆幸其舉遂偕識者相度形勢之宜經營廣狹之制先發家資取金石土木徵工募徒自築一面於是伯兄子濡成其門之東同祖兄子約子元成其門之西北及諸鄉之民而沈而陳某該城尺凡幾某該城丈凡幾共力

雲霄廳志

卷十七

藝文

二十

完之而間有不濟或亦取給焉城高一丈三尺廣一千一百六丈經始於壬申年冬訖工於癸酉春自是城之民無廬寢而有廬寢無妻子而有妻子者多子霖君之成勞也鄉耆陳子殷等恐久而湮沒相帥立珉以勒殊勛而徵記於予予惟城以保民維郡邑有蓋古之制也而村保之自立城則昉見於今然皆所以爲民捍患也權也權而得宜亦無不可者矣子霖君殫力於此不惟藉一時帡幪之庥而凡氄聚于是土子子孫孫永無兵燹之患矣是誠可嘉也君諱澍祖父友松公有援殍捍兵之力伯父侍郎原參政森布政瓌洎乃考提舉震俱有行義著于世則君之是舉允能世濟其美者矣故併記之

本鎮城西門外石碑

莆美張氏先祖築土城碑記

明提學林偕春本屬
參政人

夫位在匹夫而功施于衆不階乎尺土而能禦外患無宋鉞墨翟之賢
朱家劇孟之俠而樹庸烈於時垂利澤于後是非有過人之計者能之
乎莆美張氏之先有曰舉元者從其祖得仁公自西林來居其功疆近
之親數人家焉不踰載間居安懷危謀所自衛迺咨諸其弟若俊元若
姓元等曰古有設險守國之義家與國一而已吾宗宅于斯殖于斯育
子姓于斯冀衍無疆儲生聚而壘培缺焉將何以爲不虞是豫竊欲以
力之所能者築土城何如僉曰善上其事于巡按御史簡公公義之退
勿廣狹量崇卑鳩衆課丁計貲授畚於宏治乙丑十月經始越數月造
成基址塗旆鞏然以堅垣墉溝域井然惟匹未幾山寇流劫聚七千餘
黨來攻之多方設禦經旬解去時正德丁卯也環雲霄未有他城遠近
賴以全活者甚衆罔不多舉元之能而予其城守爲大有力後五十餘
年爲嘉靖戊午倭夷窺伺我隙荐至荼毒適四方昇平之餘民不習兵

革粹爾內訌遠近騷繹委村落而棄之是城獨死守數晝夜以存無論
其宗卽來依者亦恃無畏自是益增且葺練于武事四援咸興營堡相
望寇不敢逼而三務成功然後知是城之風聲峻以遠舉元之功大以
遐嗚乎昊天不備東南有警上自浙直下至閩廣分符守土者豈無其
人擁旄分閫者豈無其人飾智勇而擅壯猶者豈無其人然城爲屠里
爲墟者詎止一二而是城以葺爾介山海之間上下數十餘年兩當勦
敵而不陷此非其計豫使然哉允可謂功施於衆者矣能禦外患者矣
樹庸烈於時垂利澤於後者矣其嗣孫蓋藩君讀古書爲時髦士善繩
乃祖之武而不揚其烈謀鑄諸石以志不朽使後之宅斯城者知創之
艱而守不易求文於予予素嘉其事且里爲輔車勢相倚伏宵柝之警
於是城不爲無助遂爲紀述其事爰系以辭云辭曰塌塌張氏旣果且
方有繁其姓戎作之防爰止於時作城仡仡以容以守莫之敢拂載扼
狂寇里門不捐荐有峻功聲勢赫然鷄豚充閭秔稻盈畝朝滄暮春永

保黃耆迺聚迺訓有詩有書孝弟忠信其興翕如以遡厥源迺公之懋
用勒堅珉永告爾後

本雲山
文集

雲霄廳志

卷十七

藝文

三三

創立雲霄義塚約文

明舉人 吳夢麒 鎮城人

嘗謂全生全歸仲尼之大訓啓足啓手曾子之至誠雖膚髮不敢毀傷况身體豈容燔灼惟以火爲刑則初起於王莽之世而相沿成俗遂惑於緇黃之言爛頭焦額不見其類之有泚支分節解實爲此日之可寒結鶉者不能以具棺而懸磬者又不能以得地故同有生之數當爲無告之圖今擇地於本里將軍山之麓番人墓之旁畀以垣墻表以楸楔土着流寓之輩行商坐賈之徒苟貧而無主者我則當爲舉之其富而有禮者汝亦宜自省矣如其陷於惡而不戒則必置於理而弗容嗚呼敝席以封仲尼尚存於及物藁裡而掩孟軻亦許其愛親君子之道未能一焉先王之政先斯四者故觀此由衷之約尚鑑其逆耳之言兩負於中三靈在上

本杜菴文集

重修雲霄鎮城記

明 區龍正 漳浦知縣

雲霄鎮舊有鎮城蓋漳南鎖鑰也日久圯壞當事者蒿目計之而費無從處屬捕詎呂公偕其土之紳衿輩創議以公溪泥泊入其稅數稔可充厥費上之撫按司道下其議於本縣因酌其多寡量其出入以五歲之入得稅銀二百六十兩有奇而佃者亦稱便於是庀料鳩工週其城垣傾者築之缺者補之雉堞門樓盡飾其故而工用告成巋然改觀焉是役也不動支公帑不私役民力亦不冒破分釐經始於萬歷四十年九月念五日畢工於四十一年六月初二日庶幾於不鼓而勸不督而成則呂大夫作法之良也得民之券也於本縣何功之有驛丞鄧必進義民吳元彩陳孟華實董其事並有經營之勞者因紀之石

本北門內石碑

吳中舍護義阡頌

明文許智本屬八

學以及物爲功固有行諸郡邑式彰聖王之仁而見諸邱樊爰推髦士之義者義阡之賢於澤枯掩骼是也故少司徒吳公元孫中舍君以之君諱山邦仰其字以顏閔游夏世其家學崇止丁丑歲買地於西郭高原從陬澁闢窠之使一時被其澤者以千百計猗歟休哉不謂好事多魔使面面上草都供芻牧逮徘徊甲禁今而後喜可知也德輶克舉維竝夷好上其事於宗室郡少府朱公治邑侯余公咸俞厥請諸父老謀登諸石過或者許智而問焉或智乃漫擬如風雅以鳴我莫助之愛其詞曰卿家祖武賜瑩欽詒穀兼之岳伯任天教文佛老婆心皮壑纍纍載德深無端蠶壤且蹄泔噫嘻蒿里豈桃林不懲何以善來今我聞果報不容鍼坂頭義築相與尋繁爾蜚鳴和在陰君看八葉續朝簪崇正戊寅五月立石

南塘石碑文

明南安人游春霖

新安里下河蔡氏世居也溪源發自峯山五牙達於雲霄入海而南塘河之上游山海之道津也春夏盈潦秋冬沍寒涉者病之蔡公元斌見而惻然始爲舟以渡而旅人便焉第募渡之費或糾之鄉衆或取之家施要皆暫而不可常射利者因私設以濟鄉人患之蔡子謨輩悼先志之不行也揭私施以給舟子者三年衆慮其難繼戊午春羅君承俸張君宏智過而義之各助十金鄉之好義聞而樂施者衆謨輩喜而相謂曰是足以成先志矣乃以五十金買置田種一石民地一所共載米二斗五升以爲舟人工食之費仍構屋於其間俾奔馳者無留難之苦寄寓者遂即次之安鄉人喜其濟美以便民又恐歲久易湮竟爲豪強侵奪也僉議刻石以誌來乞于予言予謂脩整橋梁亦王政之一事蔡氏茲舉眞三代之遺民也矧乃祖旣成其始孫克繼其終羅張二君子又多助以副之固宜慕義喜施者勃然興矣又何慮於歲久而侵奪乎雖

然師旅之後饑饉之餘民有菜色體無完衣奚啻徒涉祈寒暑雨之怨者也充此心以濟之量吾力而施焉則所及者宏而觀感益衆矣余不佞方有望于蔡君及羅張諸君子是爲誌云

嘉靖十年冬勒石

國朝文

重建雲霄鎮城記

國朝戴

璣長泰進士

大總制少保元勳李公以
帝甥之貴宏翊亮之猷身佐

太宗皇帝

世祖章皇帝光啓山河介馬所馳獻琛納幣之使趾錯歸朝嘗位元宰
爲

聖天子燮陰陽懷萬國矣頃以朝廷無事煩公總制二粵入則周畢出
則方召蓋異數也安攘擴清齊駕銅柱淪閩何幸更膺福履其脩建名
城戶牖苞桑算無遺策獨雲霄一鎮扼控閩粵山海咽喉自往季以來
城堞傾圮棄險資敵公初至杖鉞行邊卽留意經理而哀鴻甫集厥工
有待會庚子冬偕安南將軍宗室都統羅公大司農少師車公巡攬斯
地卽咨會大中丞徐公決策脩復時銅山廈門之賊耽耽睥睨勢所必

雲霄廳志

卷十七

藝文

一七

爭乃眷右路總戎諱進功王公盪定蒐討勳望素隆攝重兵駐防而勳
爵海澄黃公中路總戎諱天寵許公漳協鎮諱進寶劉公並遣精銳將
領共資彈壓賊爲斂避鳩工有日少保公首捐冰俸爲僚吏倡凡規畫
酌派殫心調度諸所司奉行惟謹版築蒭芟應期嚮集仲春始基竟不
費公帑一鏹至閏秋而大工告竣樓櫓臺隍具備屹然金湯矣其雅稱
山甫城齊南仲城朔方皆

天子將相身係海內安危所不憚勞費爲國家封疆鎖鑰但雲霄於全
閩雖一片土耳其隘當兩省舟車輻輳使一方失據則舉省動搖舉省動
搖則寰區騷漾公以奠閩疆者奠天下厥功豈直南仲樊侯已哉城功
甫半僞鎮萬義萬祿等遂毀銅陵巢穴挈其衆萬餘來歸積年負固一
朝革音皆公建威消萌之力也善兵者伐謀其是之謂歟自茲海波不
揚公復入而相天子興禮樂佐太平以對揚祖宗之休命所裨蒼生蓋
未艾非獨閩人世世受底定之賜已也若夫王總戎專閩茲地獎帥忠

勤無間風雨徵檄四出蜚輓如期大工實賴以集一時奉委共事若副
將劉諱進忠之宣力干擲叅將折諱公秋廉諱興邦喻諱三元之綢繆
拮据先後兩守憲張公諱汧張公諱元璘之軫念時艱多方調劑太守
齊公諱贊樞之飛調策應綜理精密郡佐陳諱開虞閔諱子奇司理王
諱錫瑄之協規共濟與八閱月身冒風雨不避怨勞專董厥務苦心綜
核拊循之別駕王諱有容孰非大總制少保公之知人善任精於責成
者乎潭紳衿父老沐公之恩徵璣書其事于石志不諼也公諱率泰號
壽籌遼陽人時順治辛丑仲秋

本鎮城內
武廟石碑

重建鎮城文武題名紀事之碑

國朝 王有容 本州同知

自島土負固不賓以來歲竭百萬金錢以佐軍興盪盪如捉影捕風迄無得要領者雲霄濱海彈丸似非廟算所急而上蔽全漳下疏百粵逆艘衝詔躡浦必先由銅山入據雲霄以截我師救援之路

大總制李公與

右路鎮軍王公之汲汲于此未卽下鳩工之令者非一日矣庚子冬

總制公偕

安南將軍宗室羅公

大司農少師車公啣

命南巡共建大策謂其險必不可不守其城必不可不建歸謀撫軍徐公檄守憲高平張公僚長太守齊公酌派夫工裒益規制先有成畫復不以有容爲不肖俾董其事容奉令星馳省度見其荆榛滿目狐兔縱橫怒焉憂之越明年二月初十單車趨築如期則新守憲遼左張公所

雲霄廳志

卷十七

藝文

二九

檄調九縣丁夫與鎮公所統罷罷不二心之臣已鱗集縮版之下矣雲霄雖屬浦邑編里實爲詔安平和咽喉雲城應三邑自築不宜令他邑共之鎮軍王公與容獨舉春秋同惡相卹之義謂楚兵夷儀尙勤列同今雲霄逼賊臥榻無城是無雲鎮也無雲鎮是無全漳也且三邑告敝他邑庸獨安乎于是諸屬長忻然轉相譬曉容亦藉手拊循士大夫趨事勸功無敢後者四月初賊闌侵沿河覘我虛實折劉二副戎先領鎮軍公方畧輕騎徑壓敵壘賊不得志亟解去然竟以梅雨連旬比至五月淫潦漸益稽天所就城垣毀十之四又兼有海濱抗命大行撻伐十邑供億疲困致夫匠寥寥而容乃重困矣時青黃未接庚癸嗷嗷容隻身支吾既苦工又苦食疾呼旁午之文幾干歛怨爲德然卒無暇置辯也六月諸上臺以接應投誠至見其工鉅費繁周覽愾然始倍加憫念飭供如檄故容雖抱疴呻吟猶得展轉于九仞一簣之間觀厥成功焉臣力所及固憂患勞怨以之然不可謂非

廟社之靈

大總制公與鎮軍王公如天之福也城計八百餘丈城樓四座炮臺炮樓腰臺各五座窩舖一百間營房三百間女兒墻八百二十餘丈濠溝八百八十餘丈所需九縣協派灰料木植磚瓦等費約計銀二萬五千有奇轉給開支俱委官縣丞李振華等或宣勤扞禦或分力經營而制府兩差官守戎胡君起鳳李君運爲之冠推美輪功應若影響蓋鎮軍以大總制公之心爲心且諸文武吏士以鎮軍公之心爲心卽諸令長之竭誠輸將容不敏之黽勉無懈皆鎮軍之前推後挽之効不獨妙謨天威永壯南維之金湯坐鎮南人之反側也思樂之頌曰順彼長道屈此群醜嗟夫長道之順孰有如建藩設險不戰而屈人兵者然唐城元菟樂浪城三城宋城合州取効遠者或數十年或百十年未有池隍甫具而僞鎮萬義萬祿遂毀巢挈衆來歸若茲城之効之速者也總制公了了天下形勢經理一隅而方夏底定鎮軍懷遠折衝玉券丹書將無

雲霄廳志

卷十七

藝文

三十

偕此容不敏特幸從僚長齊公僚友陳公閔公王公後以仰承

大總制與鎮軍之鞭策喜島土之不用兵自今日始故特志之時順治

辛丑仲秋

本城內武廟石碑

重建雲霄朱文公祠引

國朝漳浦縣人陳汝咸

浦屬雲霄西林溪與海水合清濁相間厥名漳江唐垂拱間始建州於此草昧初開人文樸畧也貞元間徙州治龍溪至宋稍盛迨紫陽朱文公知此州以文治治其民民化之家絃誦人詩禮矣五百年來風流未泯漳人士皆尸而祝焉况雲霄烟火數千家名公卿比肩接踵又開屯建置之權輿哉故有文公祠在鎮城之西配祀以前明太守四明施公時司空蔡公實紀其事兵燹以後基址蕩然非萃羣力而舉之弗克也余令漳浦十有二年自邑中及銅山杜潯前後置義學合雲霄而四歲延邑文行之最者爲之師雖不敢追跡文治之盛然倣先賢遺意以佐聖天子作人雅化亦吏斯土者之責也顧此祠旣廢肄業者苦於齋舍之無所定心常慙焉擬重爲脩舉因歲捐貲貯之庫爲庀材計聚腋而裘待同志久矣一日再過雲霄有縉紳生徒合詞而前曰願得數言弁簡端以共成公志余謂斯舉也數善備焉祀紫陽崇正學也四明後紫陽

爲有漳賢刺史合而祀之表循良也有廢必興有作必成念前勞也祠成廣廊廡爲學講藝明道俾勿壞教無疆也雲之人文其駸駸上而莫知所極哉余旣喜雲之多同志仍悉傾數歲之捐拭目以觀成焉

本浦邑志

縣志按是祠議始于丁亥之冬越明年春購地于鎮城北門之外旣興工垣墻榱桷甫具則予已調南靖矣因慮工程浩大且祭祀之費無所出以雲霄舊有公溪泥泊原屬官物納餉之外贏餘不止數倍附近勢豪借名請佃奄爲已有因撥入祠內以一半爲春秋祭費及義學師生膏火一半積之三載爲諸生赴省鄉試之資更有八坊埔屯田一分軍戶久已散亡今招佃開墾成熟并撥爲祠內義田及諸渡船稅今附志於此以俟後之振興釐剔者無爲勢豪復奪焉

雲霄義學記

國朝進士陳天達本屬人

邑侯陳公來治浦甫下車卽有事義學延蔡生爲師於儒學東偏授徒每月親課以文頃之又於銅山所建義學延王生爲師如邑中之例而吾雲霄鎮聞風興起諸生詣公自白請主義學公允所請爲之色喜卽延明經吳君爲師幸邑中義學之興漸廣也是其說可得聞與蓋古者天子諸侯之國比閭族黨皆有學是以學無不設之地地無不學之人後世郡邑雖有學士子未嘗肄業其中而且非補博士弟子則以爲於我無與是故唐宋以來賢士大夫留意斯文嘗設立書院以徠四方學者倣古比閭族黨之遺而卒未嘗拘於其地與其人如宋時嶽麓等書院造舍至數千間聚徒至數千人朝廷爲之賜書賜額以寵榮之是所謂不拘於其地與其人也雲霄居浦邑西南七十里爲古懷恩縣地自唐開元二十九年省懷恩入漳浦卽其地爲鎮魚鹽商賈之利倍於邑中民近市而囂不可無以教之今何幸聞風興起自請立學非公之右

文重道力爲感召何能興起若斯乎是其意誠美而其風良足嘉也宜公之亟進而予之也又其地聯和詔兩邑一時來就學者不止隸浦邑版籍誠哉不拘於其地與其人矣公以文學飾吏事如舉講經會纂脩邑志復先賢祠宇表揚忠節請題旌高年人瑞力以轉移風化爲已任固不獨沾沾此事已也然而建立義學要已余因詳其說而爲之記

與林子九書

國朝宮保
尚書蔡世遠

前擬有粵東之行過雲霄觀西河之風規既而不果雲霄山明水秀科第人物抗衡上國邇來五十年不得一登賢書豈山川之秀鬱而未舒抑師友之砥礪有未得其道歟足下行修名立有經師人師之望今歲授徒於茲所示以入德之方作文之要必能敦懇詳盡啓發宏多斯誠雲霄之安定也竊謂文章之要以氣脈清真詞義精采爲主顧清真非體認儒先講解不可精采非窮經讀史不能根底盤深而出之以雅醇此文章之秘鑰也非爲科名然科名不難得也抑吾聞凡爲師者非徒教人以文也必使之篤倫理嚴義利馴致爲有用之儒孟子所謂其子弟從之則孝弟忠信是也今之爲師者多不務此講章句課入股而已風俗之所以不古者若以此然必欲人人執而教之甚難莫若講小學數條敦切開示又令午後書古人嘉言善行各一條粘之壁端不書者有罰重出者有罰不拘何書但據所見或取心得大能裨益性情次亦

可資記誦先入之言聞之既熟則行誼敦而風俗可轉習俗移人初猶目以爲迂行之既久則非笑者翻自非笑矣凡作一事必須劈頭斬截不然直是泛泛悠悠無一下手處也

移建 朱文公祠記

國朝大學士 蔡新 漳浦人

國家崇儒重道教化所治卽陬澨之鄉咸知祖

尼山而宗 考亭况吾漳乃 文公過化之邦號稱海濱鄒魯尤希賢

希聖之恐後者哉雲霄古懷恩地也山川秀美人文特盛舊有

紫陽書院在其城西前輩家大司空諱思充爲文以記後遷於城外之

北形勢散漫郊野荒涼都人士以爲非所以崇祀

先賢也因僉議移建於鎮城內名山四照規模宏遠初議之興也捐金

一百圓以上者勒石題名世世頌胙餘隨願力皆名載貞珉並垂不朽

貢生張君藍玉慨然有志捐白金二百以爲倡於是相繼樂助邪許同

聲經始于乾隆癸巳年訖工于丙申年歷四寒暑而成計糜兩千餘金

堂基聿煥俎豆重新焉先兄青巖公同年友雲水高先生暨諸紳士徵

記於余余曰

先賢祠宇固非欲雕刻華麗博觀美也又非徒以地靈人傑爲取科名

掇菁紫計已也蓋建祠講學奉祭行禮上妥 神靈下習揖讓當思務

於根本之地有志於聖賢之途矣 朱子嘗云聖賢之學非有難知難

行也孝弟忠信禮義廉恥以脩其身而求師取友誦詩讀書以窮事物

之理是二端者用力以求則自身而家國天下無所處而不當庶共循

朱子之教脩諸家獻諸廷以仰副

聖天子壽考作人崇儒重道之至意也哉是爲記

新拓書院學舍記

本府同知李承報登林進士

雲霄紫陽書院祀

朱文公卽以爲諸生肄業所蓋浦邑舊義學之一也前二進規模如式惟庭院稍隘祭期難以序班及外無旁舍耳至後三間爲一堂兩室則偏於右者三之一東接民舍圍墻入院中空碍偏仄間癸巳初建時曾議購之而索價高事遂寢閱今近三十年辛酉春仲余權茲土初謁祠周覽卽有所未慊措度數月冬杪始克以百八十金得之明年春仲因次第撤其窒碍之墻而脩葺頹朽又三十餘金於是增一堂兩室又東廂一間以備庖爨而後院乃平正寬綽矣掌教蔚其吳君請記之余曰未也雲地舊隸浦邑者三十保領以縣丞此蓋浦邑之鄉學耳今則益以和詔之二十七保而以府丞專轄之地旣加擴從學者當益衆是須卽此後院平連之六間改建爲正三間如中進式以祀文公而中進則閣之以祀

雲霄廳志

卷十七

藝文

三五

文昌帝君其下去墻設屏榻爲講肄所祭祀卽撤屏序拜又於東西各添購基地增建房舍爲諸生誦讀書室庶幾規模具人文亦蔚然盛起焉是余之所綣綣欲俟觀成庶有以記也是年秋將得代以去知其未逮乃記拓此三間之歲月於版而并述所願蓋重有望于後之君子云

爾補入

新建雲霄石礬塔碑記

本府無錫同知薛凝度進士

雲霄故郡治扶輿磅礴名山環映獨缺東南一面漳江自西林至佳洲合南北港過石關逶迤瀾漫由是入海內有南北塗塞其口外有南北岐束其腰出兩岐山始濳而成巨浸有小島突起其中巉巖秀削適當其缺高數丈如笋尖舊名石礬形家謂之華表捍門足以鍾靈毓秀故此地前明甲科極盛

國朝海氛時爲巨寇繫船曳倒震撼粉碎雲霄文物由是就衰康熙時邑紳陳公天達於島石上募建石塔以補其缺高不盈丈低小不稱乾隆戊戌己亥間少尹李公維瀛相視地形復與諸生議增其制以經費維艱中止傾頽缺陷客過是間輒流連嘆息蓋越百餘年於茲矣歲甲戌夏五諸生集書院會議照移建文祠捐金例捐造石塔詢謀僉同呈請前任王 題序勸捐得集金四千七百有奇鳩工伐石經始于初秋月吉日役工百人閱四月相輪完具而塔告成擴其址周七丈二尺增

其高計八丈二尺七寸空其中分爲七層方其外熨爲八面上各闢四門玲瓏洞徹其正門顏曰斯文永昌與將軍山對峙具天乙太乙兩峯拱護勝概以壯雲霄輿圖雲之士庶買舟往視者日以百計咸稱巨觀云又以餘金砌石蛇尾渡頭石磴十餘丈烏坵渡頭津亭一椽以利濟者夫是議之興也百年廢墜剏興一朝宜有難焉者矣乃陳公募建而規模未稱李公議增而經費難籌今則一倡義而紳士皆有同心殷富樂輸所有兩風順軌潮汐安流不數月而葺事若有陰驅而默相之者是何前此之難而今日之易歟豈石礬之興廢固自有其時歟抑亦雲霄之文物由衰將盛靈秀之氣散而復鍾天將啓之而石礬不得不砥柱中流爲東南補其缺有莫之爲而爲者歟余雖不能文而幸蒞茲土以觀厥成且深望乎雲霄之人士爭自濯磨相與文物聲名克復其始以大副乎石礬之鍾靈毓秀於是也因勉徇紳士之請紀其興廢之由盛衰之異脩補之難剏造之始經畫之規率作省成之年月日時俾後

之登覽者知石礮之成非偶然焉文之工拙不暇計矣是爲紀

補入

雲霄廳志

卷十七

藝文

三七

烏坵渡蒼生待濟亭跋

本府同知薛凝度無錫進士

石礮塔工既竣紳耆以烏坵渡口行人待濟苦無以蔽雨風請於官地曠埔建亭并書數言余甚樂乎一椽之亭而往來其間者已各得廣廈之千萬間也因落其成而書以顏其亭

嘉慶甲戌嘉平

吉旦

石礬塔祀田紀畧

本府無錫同知薛凝度進士

石礬塔關雲霄形勝離雲霄鎮城四十里塔工成諸董爭慮無以防護之適鄰近是塔有漳浦轄白衣保廢廟一所共商將造塔杉木及運石船隻變價得叁百餘金倡修重興而以僧振衣主之俾得時常巡視禁止魚工水師塵穢相輪復令僧每歲中元於塔下作盂蘭之會使百靈蜿蚺來享飲食已閱三載矣僧苦於年年募化請諸董事以捐金尙有未交清者來告因飭令武生陳廷魁補繳其父與叔未完銀壹百兩交董事置田以給之田既成價余已奉檄將攝府篆去因爲誌其畧并將田段開載於後而勒諸石使是祠與是塔共世守勿替云

計開贖買田段

一坐址本廟前崎圳一大坵并南岸二小坵共受種一斗一升帶漳浦縣寺餉六分又一坵坐址和尚井受種四升帶寺餉二分六釐年共結實稅粟四石二斗

雲霄廳志

卷十七

藝文

三九

一坐址在白衣洋土名猫空一大坵受種一斗帶漳浦縣林一貴糧五分年結實稅粟二石四斗

嘉慶二十一年十一月

日穀旦勒石

新建先農祠記

吳文林本屬明經

郡邑四隅立祠壇以禮祀天人神鬼甚鉅典也雲霄唐時故郡規制就湮莫考

今上初年改設廳治統轄五十餘保隱然專制典禮仍簡畧未脩辛酉粵西李公由鄱郎來攝茲篆始建風雲雷雨山川社稷鄉厲之壇於郊之東西北既歲事獨缺其南一面無所藉以申崇報心焉惕之謂禮重先農臚在祀典奠於陽位爲宜余邦牧是司其或廢之將何以成民而報

天子命接圖稽籍擇於故城門南得福地焉剷除荆棘鳩工庀材構祠前後二十楹門堂戶牖俱備奉先嗇司嗇之主合享其中經始於壬戌春仲之月以夏五十二日竣其功計糜白金二百四十兩考耒耜之利昉於神農稼穡之教原於后稷其功德隆者其俎豆不祧崇而祀之自有唐啓土以來未復之典禮於焉不墜居斯土者亦將春有所祈秋有

雲霄廳志

卷十七

藝文

四十

所報水旱疾疫有所祠而禱焉是公大有造於此邦也謹志之以示不忘補入

